

人事典第七十九卷

遇合部藝文三

七徵

晉陸機

元虛子耽性冲素雍容元泊棄時俗而弗徇甘漁釣於一壑乃有通微大夫怨皇居之失寶傷鴻誓之後聞策元黃於榛險憑穴巖而放言通微大夫曰奇膳玉食窮滋致豐簡犧羽族考牲毛宗俯出沈鮪仰落歸鴻剖柔胎於孕豹宰潛肝乎豢龍拾朝陽之遺卵納丹穴之飛凰神宰奇稔嘉禾之穗含滋發馨素穎玉銳灼若皓雪之頽元雲皎若明珠之積緇匱素蟻踊而澆澹滋芬溢而相徽味雖濃而弗爽氣既惠而復奇介景福於眉壽裕溫克乎齊聖子能饗之乎通微大夫曰豐居華殿奇構磊落萬宇雲覆千楹林錯仰綏瑰木俯積璵石敷延袤之廣廡矯凌霄之高閣秀清暉乎雲表騰藻蔭之奕奕珍觀清榭岳立連行雲階飛陛仰陟穹蒼聳浮柱而虬立施飛檐以龍翔回房旋室綴珠襲玉圖畫神仙延祐承福懸闥高達長廊廻屬於是登漸臺理俊音鏡元沚望長林逐狡獸弋輕禽覽壯藝以悅觀聆和樂而怡心子能居之乎通微大夫曰金石諧而齊響埴篲協而和鳴於是才人

進羽籥元弁被藻襲俯縈領以鴻歸仰矯首而鶴立激長歌於丹唇發鏗鏘乎柔木合清商以絕節
揮流徵而赴曲奏南荆之高歎詠易水之清角爾乃覩蛾眉之羣麗容既都而又閑矯纖腰以逐節
頓皓足於鼓盤舒妍暉以妖韶若陵危之未安通微大夫曰蓋聞沫北有采唐之思淇上有送予之
歎關雎以寤寐爲戚漉漉以謔浪爲歡若夫妖嬈豔女蒐羣擢俊穆藻儀於令表茂當年之柔嫵聲
妍規之約綽體每變而增閑秀芳蕤其愉愉若餘穎之可餐若夫靈晷潛祖顏退羽觴升清琴厲因
清明以宣誠流微睇而授愛纖手揮而鳴佩鏗華衿被則芳塵萃子其納之乎通微大夫曰塗有殊
而一致業有殊而名約各因姿以效績期寄響於天人也孰與顯奇蹤於萬邦撫六轡而高遊瞰八
宇以攄眎齊清風乎諸侯言成否泰氣作溫涼弭侵略于強暴綜墜紀乎危邦子豈不願斯之雍容
乎通微大夫曰明主應期撫民以德配仁風於黃唐齊威靈乎宸極彝倫幸序庶績咸乂盪流風於
雍俗給天民乎齊泰是以元靈感而表應嘉神繁而畢覲舞唐庭之來儀鳴岐陽之鸞鸞應天監之
休命荷神聽之介福然聖主達持盈之寶術寤經國之在賢各畢榮於分局期贊化於大鈞吾子豈
不欲縻好爵於天宇顯列業乎帝臣歟元虛子作而言曰甚哉鄙人之惑也猶窮繩自逸于井幹憑

河盜本于黃川欽至論數敝衽謹聞命於王孫

演連珠

前人

臣聞應物有方居難則易藏器在身所乏者時是以充堂之芳非幽蘭所難繞梁之音實繁絃所思臣聞智周通塞不爲時窮才經夷險不爲世屈是以凌飆之羽不求反風曜夜之目不思倒日

臣聞利眼臨雲不能垂照朗璞蒙垢不能吐暉是以明哲之君時有蔽壅之累俊乂之臣屢抱後時之悲臣聞因雲灑潤則芬澤易流乘風載響則音徽自遠是以德教俟物而濟榮名緣時而顯

臣聞絕節高唱非凡耳所悲肆義芳訊非庸聽所善是以南荆有寡和之歌東野有不釋之辨

臣聞飛轡西頓則離朱與矇眊收察懸景東秀則夜光與礧礧匿曜是以才換世則俱困功偶時而並効

九愍

陸雲

昔屈原放逐而離騷之詞興自今及古文雅之士莫不以其情而玩其詞而表意焉遂廁作者之末而述九愍

裔皇聖之豐祐膺萬乘之多福眞龍暉以底載啟元辰而誕育考度中以錫命端嘉令而自蕭蘭情
馥以芬香瓊懷皎其如玉希千載以遙想昶遠思而自怡範方地而式矩儀穹天而承規結丹款於
璇璣協朱誠于四時咨中心之信修佩日月以爲旗悲年歲之晚暮殉修名而競心仰勳華之耿暉
詠三辟之遐音握遺芳而自玩挹浩露於蘭林陰雲紛以興靄颺風起而回波黨朋淫以惡美疾傾
宮之揚娥樹椒蘭於瑤圃掩夜光于瓊華遵貞心以誰忒毀玉質而蒙瑕甘芳言而棄予忽遐放其
若遺瞻前軌而我先顧後乘而駕遲遵荒塗而伏軾撫鳴鑾而稱悲感瞻烏之有集嗟離雁之焉歸
靜沉思以自瘁願凌雲而高飛

修身

逢天怒而離紛遭時咎于惟塵端周誠以恪居祇後命而自寅悲讒口之罔極隔離情于參辰豈三
錫之又睇乃裔予於遐賓運羽櫂以涉江浮鄂渚而駕言背夏首以寤逝兮沂行川而永嘆結風回
而薄水兮源波縈而重瀾情懷眷以疊結舟淹流而中盤昶愁心以自邁蕭榜人而曾謳詔河馮以
清川命湘娥而安流濟南詔以佇望野蕭條而振疇獸悲號以命侶鳥狂顧而鳴仇悲我行之悠悠

怨同懷之莫求發辰陽而往彼緣湘沅而來假亦芳樹於縣車秣梁苗于樊馬山嵩高以藏景雲掩
靄而荒野鳥拊翼于蜚巔水回波于宇下指明星以脉路景卽陰而無旅隨長川以問津響修聲而
和予聽歸音以自聞踐無跡以窮處雖遘愍之旣多亦顛沛其何悔仰衆芳之遺情希絕風之延佇
亂曰有鳥翻飛集江湘兮彼美一人莫予將兮念茲涉江懷故鄉兮生日何短感日長兮顧我愁景
惟永傷兮

涉江

原本闕六字

積沉毒於苦心魂憑虛以飄蕩形息景于重陰虎鳴颿以拂谷螭回雲而結林操土

音以懷郢涕頻代而盈襟辭終古之舊墟託茲邦而遙集望龍門而屢顧攀惟桑而抵泣悲愁心之
難狀振枯形而獨立撫彫容之日頽怊炯思而弗及聞先黎之達教固積善於遺慶晞明休而受言
想介福之保定靡心貞以祇服沂大順而委命君在初之嘉惠每成言而永日怨谷風之攸歎彌九
齡而未徹願自獻於承間悲黨人之造膝舒幽情其曷訴卷承懷而淹恤嗟哲士之足歎傷邦家之
殄瘁痛靈修之匪懷頽九成于一簣忘大寶之勿假輕挈瓶之守器仰剪翮于凌霄俯歸飛于矰罟

毀方城于秦川投江漢于泥渭悲彼黍之在野悼宗楚之莫飭撫傷心以哀告將斯情之孰慰

悲郢

登高山以遐望念悠處之淹流豈大川之難濟悲利涉之莫由申修誠以砥節反內鑒而自求考余
心其焉可往稽度于神謀訪斯言以卜居想貞龜以告猷將矯翼而塗險思振清而世濁羌釋筭而
評子諒不疑其何卜朝彈冠以晞髮夕振裳而濯足有懷沙以赴淵無抱素而蒙辱愁纏綿以宅心
長歎息而飲淚步江潭以彷徨頻行吟而含悵遇漁父之戾止興讜言而來憩雖懷芳而握瑜懼輕
塵之我穢顧虛景而端形矧同波於俱醉追伊人之逍遙聊仰葉于林側懷達心以遠寤怡衰顏而
而表色仰班荆之遺情想嘉訊而良食若有言而未吐忽棄予而凌波揮龍榜以鼓汰遺芬響而清
歌俟滄浪之濯纓悲余壽之幾何愧褊心之嘆渝恨爾謁之莫和捐江魚之言志營元寢于汨羅苟
懷忠而死節豈有生之足嘉

行吟

悲怨思之多感情惆悵而遠慕世元黃而既淪心居貞而抱素冀斯氣之一清要佳人于天路考年

載以遲之悲歲律之已暮攬豐草於朝日思先晞于湛露規法圓而天象矩則方於地形祇信順以自範邀式穀于神聽悲登魂之無抗訊貞夢而通靈悔抱道而懷顧悲實蕃之已盈頓椒丘而息駕振初服而翱翔結瓊蕤之芳襟襲凌華之藻裳懷瑤林之珍秀握蘭野之芳香命巫咸以啟期訪百神而考祥靖永言以聽命欽靈諄而肅邁振華冕之玉藻樹象軒之高蓋鸞假翼以鳴和霓揮景而縈施芳塵穆以烟熅彤雲起而深藹游八極以大觀解飛轡以長想將結軌而世狹願援楫而川廣雖我服之方壯思振策其安往舒遠懷以弭節褰世羅於天網亂曰猗猗芳草植山阿兮朝日來照發豐華兮秋風蕭瑟凝霜加兮傾葉懷春猶俟河兮

紆思

徧周流而無過悲窮思之永久聽幽荒而罔詔眷寥廓而無友沉流液于繩樞逝回飊于甕牖呼寂寞而靡應攬虛無其何有神悠悠而永念憂綢繆而盈室哀惻心而響起時棄予而景逸招逝運其難徵儀遺範而無律雖芳林之將焚豈蘭響之可謚晞馥風于曠野思同芬而靡質命險太其靡常道離隆而匪易紆幽情而思古援在昔而立辟俟重華以同遊悲瑤圃之難適舟登陸其焉濟輪涉

淵而無迹悲荒塗之旣舛臨遵渚而投策欲隨波以周流恨匪石之難頽將從風而卷舒悲直矢之辭懷貞朗志而玉折厲勁心而蘭摧喟我懷以寤歎闔前鑒而自融忠與邪其莫可豈余命之所窮俯投迹而世滂仰晞志而道隆恥蒙垢于同塵思振袂于別風明爽心以畢志考吾道以自終

考志

天機偏其挺蓋玉衡運而回裏景彌修而日短時愈促而夜長和音變而改律乘風革而爲商感秋林之夙暮悲芳草之中霜存倏忽而風邁逝揮霍而雲散方輕焱而炯遲比收電而景宴將愉樂以夙興迢良日於昧旦痛予生之不辰逢此世之多難將藹藹而未颺世渾渾其難澄風頽山以離谷波平淵而爲陵道曠世而朴散化固滯而物凝恨輜德以莫舉悲民鮮之孰勝景照明以妙見音振響而攄聞金淬堅以示斷芭靡質而效芬馨貞規以殉節反蒙謫于朋羣咨小心以惴惴悲江草之芸芸亂曰浮雲晦靄天明息兮增羅重設鳳矯翼兮梧桐逝矣樹榛棘兮思我芳林喟嘆息兮

感逝

哀時命之險薄懷斯類以結憂手拊膺而永嘆形顧景而長愁生遺年而有盡居靜言其何須將輕

舉以遠覽眇天路而高遊結垂雲之翠虬駕琬琰之玉輿揮采旄以烟指靡華旌而電舒命日月以
清天吾將遊乎九閼命屏翳以夕降式飛廉以朝興塗蒙雨而後清景貞暉而先登陪湘妃于雕輅
列漢女以後乘瓊蛾起而清嘯神風穆其來應騑憑雲而響駭驂噓天而景凌望紫微以振策躡太
階而遂升飛芝蓋之翼翼回雲車之轆轤朝總轡于扶桑夕飲馬於天津伐河鼓以解徵迄崑崙而
凱振軌淩虛而遺跡塵蒙颿而絕輪豈遠遊之無樂懷故都而傷情靡龍首以還顧轉瑤衡而回縈
泝凱風以流盼悲舊邦之穢傾眷南雲以興悲蒙東雨而涕零淩百川而絕蹈仰濯髮于崢嶸豈沈
瘁之足弭將蟬蛻于長生

征

痛世路之隘狹詠遂古而長悲鏡端形於三接照直影于太微祇中懷以眷暮豈鑒昧而忘歸悼天
朝之遂晦構貝錦於繁文侈南箕以鼓物藹青陽而播芬跡同塵而壤絕景和光而天分俯隕息於
縈波仰頽嘆而崩雲折若華以翳日時靡靡而難停餐秋菊以却老年冉冉其既盈欲假翼以天飛
怨曾飈之我經思戢鱗以遁沼悲沈網之在淵有河清而志得挫千載之長年擠哀響於頽風寓悲

音於絕絃嗟有生之必死固逸我以自休彼達人之遺物甘褰裳而赴流矧余情之沉毒資有生以速憂悼居世其何感固形存其爲尤想百年之促期悲樂少而難多修與短其足奚曷久沉於汨羅投瀾漪而負石涉清湘以懷沙臨恆流而自墜蒙濬壑之隆波接申胥於南江

闕三字
於闕二
字

鼓層

雲以攜手仰接景而登遐

元居釋

晉束皙

束皙閒居門人竝待方下帷深譚隱機而吟含毫散藻者撰同異在側者進而問之曰蓋聞道向變通達者無窮世亂則救其紛時泰則扶其隆振天維以贊百務熙帝載而鼓皇風生則率土樂其存死則宇內哀其終是以君子屈己伸道不恥于時上國有不索何獲之言周易著躍以求進之辭莘老負金鉉以陳烹割之說齊客當康衢而詠白水之詩今先生耽道修藝嶷然山峙潛朗通微洽覽深識夜兼忘寐之勤書騁鑽元之思曠年累稔不墮其志鱗翼成而愈伏術業優而不試乃欲闔閭辭價泥蟠深處永戢琳琅之耀匿首窮魚之渚當唐年而慕長沮邾有道而反甯武識彼迷此愚竊不取若乃士以援登進必待求附藝之黨橫擢則林藪之彥不抽丹墀步紉袴之童東野遺白顛之

豐盍亦因子都而事博陸憑鍋首以涉洪流蹈翠雲以駭逸龍振光耀以驚沈鱗徒屈蟠於塤井眇
天路而不遊學既種而身困夫何爲乎祕丘且歲不我與時若奔駟有來無反難得易失先生不知
肝豫之讖悔遲而忘夫朋盍之義務疾亦豈能登海湄而仰東流之水臨虞泉而招西歸之日徒以
曲畏爲桔儒學自桎囚大道於環堵苦形骸于蓬室豈能託身權威憑勢假力擇棲芳林飛不待翼
夕宿七娥之房朝享五鼎之食匡三正則太階平贊五教而玉繩直孰若茹藿餐蔬終身以匿哉東
子曰居吾將導爾以君子之道諭爾以出處之事爾其明受余訓謹聽余志昔元一既敗兩儀肇立
離光夜隱望舒晝戢羽族翔林蜃蛸赴濕物從性之所安士樂志之所執或背豐榮以巖棲或排蘭
闥而求入在野者龍逸在朝者鳳集雖其軌迹不同而道無貴賤必安其業交而相羨稷契奮庸以
宣道巢由洗耳以避禪同垂不朽之稱俱入賢者之流參名比譽誰劣誰優何必貪與二八爲羣而
恥爲七人之疇乎且道賤而通士不同趣吾竊綴處者之末行未敢聞子之高喻將忽蒲輪而不眴
夫何權威之云附哉昔周漢中衰時難自託福兆既開患端亦作朝遊魏峨之宮夕墜崢嶸之壑晝
笑夜歎晨華暮落忠不足以衛己禍不可以預度是士諱登朝而競赴臨薄或毀名自污或不食其

祿比從政于匣笥之龜臂官者於郊廟之牘公孫泣涕而辭相揚雄抗論於赤族今大晉熙隆六合
寧靜蜂蠆止毒熊羆輟猛五刑勿用八紘備整主無驕肆之怒臣無輦纓之請上下相安率禮從道
朝養觸邪之獸庭有指佞之草禍戮可以忠逃寵祿可以順保且夫進無險懼而惟寂之務者率其
性也兩可俱是而舍彼趣此者從其志也蓋無爲可以解天下之紛澹泊可以救國家之急當位者
事有所窮陳策者言有不入翟璜不能迴西鄰之寇平勃不能正如意之立于木臥而秦師退四皓
起而戚姬泣夫如是何舍何執何去何就謂山岑之林爲芳谷底之莽爲臭守分任可唯天所授鳥
不假甲於龜魚不假足於獸何必笑孤竹之貧而求齊景之富恥布衣以肆志靈文裘而拖繡且能
約其躬則儋石之積以豐苟肆其欲則海陵之積不足存道德者則匹夫之身可榮忘大倫者則萬
乘之主猶辱將研六籍以訓世守寂泊以鎮俗偶鄭老於海隅匹嚴叟於僻蜀且世以太虛爲輿元
鑪爲肆神游莫競之林心存無營之室榮利不擾其覺殷憂不干其寐捐夸者之所貪收躁務之所
棄耀聖籍之荒蕪總羣言之一至全素履於丘園背纓綬而長逸請子課吾業於千載無聽吾言於
今日也

抵疑

夏侯湛

當路子有疑夏侯湛者而謂之曰吾聞有其才而不遇者時也有其時而不遇者命也吾子童幼而岐嶷弱冠而著德少而流聲長而垂名拔萃始立而登宰相之朝揮翼初儀而受卿尹之舉盪典籍之華談先王之言入闔閭躡丹墀染彤管吐洪輝干當世之務觸人主之威有效矣而官不過散郎舉不過賢良鳳棲五期龍蟠六年英耀禿落羽儀摧殘而獨離容藝文蕩駘儒林志不輟著述之業口不釋雅頌之音徒費精而耗力勞神而苦心此術亦已薄矣而終莫之辯宜吾子之陸沈也且以言乎才則吾子優矣以言乎時則子之所與二三公者義則骨肉之固交則明道之觀也富于德貴于官其所發明雖叩牛操築之客備賁抱關之隸負俗懷譏之士猶將登爲大夫顯爲卿尹於何有寶咳唾之音愛錙珠之力向若垂一鱗回一翼令吾子拔其飛騰之勢挂其羽翼之末猶奮迅於雲霄之際騰驤于四極之外今乃金口玉音漠然沉默使吾子棲遲窮巷守此困極心有窮志貌有飢色咨江河之流不以濯舟船之畔惜東壁之光不以寓貧婦之目抑非二三公之蔽賢也實吾子之拙惑也夏侯子曰噫湛也幸有過人必知之矣吾子所以褒飾之大矣斟酌之喻非小醜之所堪也

然過承古人之誨抑因子大夫之忝在敝室也敢布其腹心豈能隱凡以覽其槩乎客曰敢祇以聽
夏侯子曰吾聞先大夫孔聖之言德之不修學之不講聞義不能徙不善不能改是吾憂也四德具
而名位不至者非吾任也是以君子求諸己小人求諸人僕也承門戶之業受過庭之訓是以得接
冠帶之末充乎士大夫之列頗闢六經之文覽百家之學弱年而入公朝蒙蔽而當顯舉進不能拔
羣出萃却不能抗排當世志則乍顯乍昧文則乍幽乍蔚知之者則謂之欲逍遙以養生不知之者
則謂之欲遑遑以求達此皆未是僕之所置也僕又聞世有道則士無所執其節黜陟明則下不在
量其力是以當舉而不辭入朝而酬問僕東野之鄙人頑直之陋生也不識當世之便不達朝廷之
情不能依靡容悅出入崎傾逐巧點妍嘔喁辯佞隨羣班之次伏簡墨之後當此之時若失水之魚
喪家之狗行不勝衣言不出口安能于當世之務觸人主之威適足以露狂簡而增塵垢縱使心有
至言言有偏直此委巷之誠非朝廷之欲也今天子以茂德臨天下以八方六合爲四境海內無虞
萬國元靜九夷之從王化猶洪聲之收清響黎苗之樂函夏若遊形之招惠景鄉曲之徒一介之士
曾諷急就習甲子者皆奮筆揚文議制論道出草茅起林藪御青瑣入金墉者無日不有充三臺之

寺盈中書之閣有司不能竟其文當年不能編其籍此執政之所厭聞也若乃羣公百辟卿士常伯被朱佩紫耀金帶白坐而論道者又充路盈寢黃幄玉階之內飽其尺牘矣若僕之言皆糞土之說消磨灰爛垢辱招穢適可充衛士之爨盈掃除之器譬猶投盈寸之膠而欲使江海易色燒一羽之毛而欲令大鑪增勢若燎原之烟彌天之雲噓之不益其熱噏之不減其氣今子見僕入朝暫對便欲坐望高位吐言數百便謂陵增一世何吾子之失評也僕固脂車以須放秣馬以待却反耕於枳落歸志乎澗瀨從容乎農夫優游乎卒歲矣古者天子畫土以封羣后羣后受國以臨其邦懸大賞以樂其成列九伐以討其違興衰相形安危相傾故在位者以求賢爲務受任者以進才爲急今也則九州爲一家萬國爲百郡政有常道法有恆訓因循而禮樂自定揖讓而天下大順夫道學之貴游閭邑之摯紳皆高門之子世臣之裔弘風長譽推成而進悠悠者皆天下之彥也諷詁訓傳詩書講儒墨說元虛僕皆不如也二三公之簡僕於凡庸之肆顯僕於細猥之中則爲功也重矣時而清談則爲親也周矣且古之君子不知士則不明不安是以居逸而思危對食而看乾今也則否居位者以善身爲靜以寡交爲慎以弱斷爲重以怯言爲信不知士者無公誹不得士者不私愧彼在位

者皆稷契咎益伊呂周召之倫叔豹仲熊之儔稽古則踰黃唐經緯則越虞夏蔑昆吾之功嗤桓文之勳抵摠管仲蹉跎晏嬰遠升鼎湖近超太平方將保重嗇神獨善其身元白冲虛仡爾養真雖力挾泰山將不舉一羽揚波萬里將不濯一鱗哆唾成珠玉揮袂出風雲豈肯蹴躡鄙事取才進人此又吾子之失言也子獨不聞夫神人乎噏風飲露不食五穀登太清遊山岳靡芝草弄白玉不因而獨備無假而自足不與人路同嗜欲不與世務齊榮辱故能入無窮之門享不死之年以此言之何待進賢客曰聖人有言曰邦有道貧且賤焉恥也今子值有道之世當太平之會不攘袂奮氣發謀出奇使鳴鶴受和好爵見縻抑乃沈身郎署約志勤卑不亦贏哉且伊尹之干成湯甯戚之迂桓公或投己鼎俎或庸身飯牛明廢興之機歌白水之流德入殷王義感齊侯故伊尹起庖廚而登阿衡甯戚出車下而階大夫外無微介內無請謁矯身擢手徑躡名位吾子亦何不慕賢以自厲希古以慷慨乎夏侯子曰嗚呼是何言歟富與貴是人之所欲非僕之所惡也夫干將之劍陸斷狗馬水截蛟龍而鉛刀不能入泥騏驎驪騮之乘一日而致千里而駑蹇不能邁敵百鍊之鑑別鬚眉之數而壁土不見泰山鴻鵠一舉橫四海之區出青雲之外而尺鷃不陵桑榆此利鈍之較優劣之決也夫